

Izvjestaj sa 32. sjednice Općinskog vijeća

32.sjednica Općinskog vijeća Ilijaš održana je 14. jula 2015. godine sa 12 tačaka dnevnog reda.

Na samom početku sjednice u okviru tačke vijećnička pitanja i inicijative vijećnici su jednoglasno usvojili Zaključak kojim se nalaže Komisiji za poslove mjesnih zajednica i saradnju sa drugim općinama i gradovima da za narednu redovnu sjednicu Općinskog vijeća pripremi i dostavi Izvještaj o radu a Koordinator za rad mjesnih zajednica u saradnji sa Predsjednicima Savjeta mjesnih zajednica, nalaže da pripremi izvještaj o radu mjesnih zajednica, te da se isti uvrste na dnevni red za narednu sjednicu Općinskog vijeće, uz obavezu prisustva Predsjednika Savjeta mjesnih zajednica ovoj sjednici.

Na trećoj tački dnevnog reda Pomoćnica načelnika u Službi za privredu, finansije i investicije g. Merima Osmanović, vijećnicima je dala uvodne napomene povodom prijedloga Izmjena i dopuna Budžeta Općine Ilijaš za 2015. godinu, naglasivši da: "Od momenta donošenja Budžeta općine Ilijaš za 2015. godinu desile su se određene promjene koje su uticale kako na strukturu tako i na visinu prihoda odnosno rashoda u Budžetu, a između ostalih to su :

- Skupština Kantona Sarajevo usvojila je Nacrt Izmjena i dopuna Budžeta Kantona Sarajevo, kojim su okviru pozicije kapitalni transferi nižim nivoima vlasti predviđene značajne izmjene kada su u pitanju kapitalni transfera za općinu Ilijaš ;
- u skladu sa korigovanom projekcijom raspodjele prihoda od Indirektnih poreza za kantone i općine došlo je do promjene u okviru projekcije za općinu Ilijaš ;
- rast prihoda u okviru pojedinih budžetskih pozicija ;

Na osnovu izloženog evidentno je da prevashodni razlozi za donošenje Izmjena i dopuna Budžeta općine Ilijaš za 2015. godinu leže u potrebi za uravnoteženjem rashoda i izdataka sa dostupnim prihodima i primicima".

Izmjenama i dopunama Budžeta općine Ilijaš za 2015. godinu utvrđeni su ukupni prihodi i primici u iznosu od 9.903.700 KM, što u odnosu na osnovni plan predstavlja povećanje za 925.300 KM odnosno za 10 % više u odnosu na Plan Budžeta za 2015. godinu.

Na ovoj sjednici usvojena je i Odluka o utvrđivanju plana parcelacije i utvrđivanje novog građevinskog zemljišta za izgradnju apartmanskog naselja Malešići, koji se sastoji od ukupno 48 građevinskih parcela prosječne površine 500 m².

Jednoglasno je usvojena Odluka o držanju stoke, pernate živine i kunića kojom se utvrđuju uslovi pod kojim fizička i pravna lica mogu držati stoku, pernatu živinu i kuniće na području Općine Ilijaš.

Potrebnu većinu glasova dobile su i Odluke o prodaji neizgrađenog građevinskog zemljišta za prodaju putem javnog nadmetanja radi izgradnje proizvodno poslovnog objekta u Industrijskoj zoni "Luka", Odluka o dopuni Odluke o načinu i uslovima prodaje neizgrađenog građevinskog zemljišta radi izgradnje 25 individualnih stambenih objekata u skladu sa konceptom Regulacionog plana Alića Gaj te Odluka o načinu i uslovima prodaje neizgrađenog građevinskog zemljišta putem javnog nadmetanja radi izgradnje poslovnog objekta apoteke uz postojeći objekat ambulante Mrakovo.

Od samog otvaranja Ambulanta porodične medicine u Mrakovu susreće se sa manjim brojem kartona od realnog a kao glavni razlog tome jeste nepostojanje apoteke na ovom lokalitetu. Općina Ilijaš je konstantno vodila pregovore s potencijalnim investitorima oko otvaranja apoteke i obzirom da se javio investitor koji ima dozvolu nadležnog Ministarstva zdravstva Kantona Sarajevo, kao hitna na prijedlog Općinskog načelnika ova tačka je naknadno uvrštena na dnevni red i dobila je potrebnu većinu glasova.

Na ovoj sjednici usvojena su i određena rješenja iz imovinsko-pravne oblasti.